

Di ersti Chilche im ussere Wasseramt

Aeschi Etziken Hüniken Winistorf
Bolken Burgäschi Steinhof

148

Ums Jahr 1680 isch me draagange, s ussere Wasseramt vo Chriegstette z löse und en eignedi Pfarrei z gründe. Sibe Gmeine hei si zämetoo: Steihof, Burg, Aeschi, Winistorf, Bolken, Etzike und Hünike. Wo men aber druff und draa gsi isch, di ersti Chilche z boue, si Etziken und Aeschi hingernanger choo. Aeschi hed e schöne Platz gha und isch guet i der Mitti gläge gsi. Etzike mit syne 30 Hüser isch aber s gröschte Dorf gsi und hed der Ton agee.

Wo s Gmärt wäge der Chilche a keis Änd choo isch, hed der Himel sälber es Zeiche müese tue. Mäder, wo scho am Morgen am drüü ufem Büel z Aeschi im Maad gstange si, hei ungerinisch i de Lüften es Singe köört, wie sälbmol d Hirte z Bethlehem i der Heilige Nacht. Und Strahle vom Himel hei uf das Fäld midem ryfe Heugras abe züngt. D Mäder si blybe stoh, hei gluegt und glost, bis si der Himel wider zuetoo hed und dä wunderschön Gsang verebbned isch.

Die Erschynig hed vill z rede gee z Aeschi und i allne Gmeine vo der Chilchhööri. Druuf hei di beede Nachtwächter, dää vo Aeschi und dää vo Etzike, drei Nächt nachnanger die Strahlen au gseh und dä wunderbar Gsang köört. Das hed der Ussschlag gee: Bolken isch eidütig ufd Site vo Aeschi abgschwänkt. Jetz hei Etzike und Hünike gäge die starchi Mehrheit nümme möge gsaage. D Chilche hed ufem Büel z Aeschi müese boued. wärde.

Buure, Handwärcher und Tagelöhner hei flyssig Frondienst gleisted. Drum isch di schöni Sant-Anna-Chilche innert föif Monede dobe gsi. Am 12. Mai 1684, em Frytig nach der Uffert, isch si fyrilig ygwiche worde. E Legat vom Fürstbischof vo Konstanz, der Weibischof Georg Sigismund, isch äxtra derfür is Wasseramt choo, und am glyche Tag hed er au no s Sant Vrenechappeli z Subige im Möösli ygwiche. Es hed es Freudefäst gee für die siben Ortschafte und alli Nachbere.

Zidhär fyred me jedes Jahr am 2. Junisundig d Chilchwychi, das heisst d Chilbi vo Aeschi, mit Buden und Rösslispil, mit Läbchueche, Chüechli und Tanz. Drum säge d Aescher Buure, wenn der Heued afoot:

Sechs Tage sollst du arbeiten,
am sibede s Moos heue
und denn isch Chilbi!

